

**Konflikråd-imut inatsit nr. 467 12. juni 2009-meersoq, tassa pineqaatisseereersimanerup qaangernerani pinerlussimasup pinerluffigineqartullu akornanni kiinneqatigiilluni oqaloqatigiissinnaanermut siunnersuineq, Kunngip akuerisaanik Kalaallit Nunaannut atuutilersinnejarsinnaasunngortikkumallugu Naalakkersuisut danskit Naalakkersuisuinut isumaqatiginninniarnissaannik peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq, Aleqa Hammond, Nunatta Qitornai)

### **Akissuteqaat**

(Peqqissutsimut, Isumaginninnermut Inatsisinillu atuutsitsinermut Naalakkersuisoq)

### **Siullermeerneqarnera**

Aalajangiuffigisassatut siunnersummut saqqummiunneqartumut massumunnga Inatsisartunut ilaasortamut, Nunatta Qitornaanit Aleqa Hammondimut, Naalakkersuisut qujapput.

Pinerluttulerinermi suliani eqqugaasut aamma pinerliisut akornanni isumaqatigiissitsiniartarnerup eqqunneqarnissa isumassarsiatsialammat Naalakkersuisut isumaqatigaat. Tamanna Eqqartuussiveqarneq pillugu Ataatsimiitaliarsuarmi innersuussutigineqartumut naapertuuppoq, tassalu pinerliisoq iliuutsiminut akisussaasunngortinnejartarnissa pingaaruteqartoq, aamma pinerliisup akisussaaffilerneqarnera inatsisigut aaqqissuussinermut taamaallaat naleqqiunneqassanngitsoq aammali eqqugaasumut najukkanilu inuiaqatigiinnut tamanut naleqqiunneqassasoq.

Eqqartuussiveqarneq pillugu Ataatsimiitaliarsup innersuussutaa tunuliaqtaralugu Inatsisinut Ataatsimiitaliap 2006-imi isumaliutissiissummi saqqummiussivoq, tamatumalu kingornatigut Eqqartuussisarnermik Inatsimmi § 319-imi akerleriinnik isumaqatigiissitsiniartarnerup eqqunneqarsinnaanera periarfissiissutigineqarpoq, tassani allasmalluni Justitsministeeriaqarfik, Namminersorlutik Oqartussat oqaloqatigereerlugit, akerleriinnik isumaqatigiissitsiniartarnermik misiligtitut aaqqissuussinermik pilersitsisinnaasoq.

Eqqartuussinermi aalajangiinermut taarsiullugu imaluunniit eqqartuussinermi aalajangiinermut tapiliullugu akerleriinnik isumaqatigiissitsiniarneq pillugu misiligtitut aaqqissuussineq pilersinnejarsinnaavoq.

Misiligtitut aaqqissuussineq aallartinneqassanersoq aamma aallartinneqassappat qanoq isikkoqarluni aallartinneqarnissa pillugu misiligtitut aaqqissuussinermup aallartinneqannginnerani Justitsministeeriaqarfimmit Kalaallit Nunaanni Eqqartuussiveqarneq pillugu Siunnersuisoqatigiinnit oqaaseqaatinik pissarsiniartoqassasoq naatsorsuutigineqarpoq.

Tamanna tunngavigalugu Kalaallit Nunaanni Eqqartuussiveqarneq pillugu Siunnersuisoqatigiit aqtsisoqatigiinnik pilersitsipput, taakkulu Kalaallit Nunaanni pissutsinut immikkut naleqqusarnejarsinnaasumik misileraanertut aaqqissuussinermik inassuteqaasiortussaapput.

Maannakkorpiaq taamatut aaqqissuussinissaq pillugu isummernissamut tunngavissaq Naalakkersuisut Justitsministeeriaqarfiullu akornanni suleqatigiissutigineqarpoq. Kalaallit Nunaanni pissutsinut naleqartitanullu naleqquttumik periaatsimik eqqortumik nassaarniarneq siunnertaralugu, immikkut ittunik ilisimasalinnik peqataatitsisoqassaaq.

Kalaallit Nunaanni Eqqartuuassisarneq pillugu Inatsimmi taamatut ittumik aaqqissuussinermik periarfissaqareerner akerleriinnik isumaqatigiissitsiniartarneq pillugu inatsisip Danmarkimi atuuttup peqqussutitut atuuttussanngortinneqarnissaa pisariaqanngitsoq, Naalakkersuisut isumaqarput.

Taamaammat siunnersuutip itigartitsissutigineqarnissaa Naalakkersuisut innersuussutigaat.